

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Parashah 4: Vayera (וַיֵּרָא) – En Hy Verskyn!

יהוה *het Homself aan hom openbaar by die Eikebome van Mamre, terwyl hy by die ingang van die tent sit op die warmste van die dag.* Gen. 18:1 – PWL¹

Daarna het Yahweh aan hom verskyn by die terpentynbome van Mamre terwyl hy by die ingang van die tent sit op die warmste van die dag. Gen. 18:1 – Woord en Getuienis.

Torah : Gen. 18:1 tot 22:24

Haftorah: 2 Kon. 4:1 tot 37

Hernieuwe Verbond: Luk. 17:26 tot 37; Jak. 2:14 tot 24; 2 Pet. 2:4 tot 10

Hierdie notas is aanvullend tot die vorige notas vir parashah 4 wat afgelaai kan word by: <http://nuwelied.info/wp-content/uploads/2013/01/Parashah4Notas14.pdf> of deur dit aan te vra by kontak@nuwelied.info

Midrash (Torah Bespreking)

Die geskiedenis van Abraham is ook die eerste insae wat die Skrifte ons gee ten opsigte van die huwelik. Hoewel hierdie insae nie so voor die handliggend is nie, vind ons dit wel wanneer ons 'tussen die lyne lees'. So byvoorbeeld lees ons die volgende:

Daarom het Sarah in haar binneste gelag en gedink: 'Sal ek plesier hê nadat ek oud geword het en my meester ook oud is?' Gen. 18:12 – PWL.

Hoewel Sarah in haar binneste gelag het by die aanhoor van die woorde: *dan sal jou vrou Sarah 'n seun hê*, het YHVH geweet wat sy dink. Maar in vers 13 lees ons egter dat YHVH vir Abraham vra: *Waarom het Sarah daar gelag en gesê: 'Sal ek werklik geboorte gee, ek wat oud geword het?'* Waarom het YHVH die woorde van Sarah: *en my meester ook oud is* weggelaat? Wat is die les wat ons hieruit kan leer?

Dit leer ons om te alle tye die vrede in die huweliksverhouding te bewaar. 'n Man en vrou moet nooit spottend of neerhalend van sy / haar huweliksmaat praat nie of enige negatiewe dinge oor die huweliksmaat teenoor mekaar of teenoor 'n ander kwytraak nie. Die rede is dat dit wrywing in die verhouding kan veroorsaak en ook dat eerbied en respek vir mekaar afgetakel word, asook dat die selfbeeld van 'n lewensmaat skade kan ly.

¹ PWL Vertaling (Pad van Waarheid tot die Lewe) kan gratis afgelaai word by www.padwlewe.ch

Petrus het Abraham en Sarah se huwelik as voorbeeld gebruik toe hy in sy brief geskryf het:

want net só het ook die afgesonderde vroue, wat 'n versekerde verwagting in God gehad het, vroeër hulleself versier en hulle was gehoorsaam aan hulle eie mans, soos wat Sarah gehoorsaam was aan Avraham en hom 'my meester' genoem het, wie se kinders julle geword het as julle goed doen en geen bedreiging vrees nie. Julle, manne, moet op dié manier met hulle saamleef: met kennis en hulle as swakkeres met eer behandel, omdat julle ook mede-erfgename van die geskenk van ewige lewe is sodat julle nie in julle gebede mag struikel nie. Die slotsom is dat almal van julle in harmonie met mekaar moet wees; ly saam met die wat ly, wees lief vir mekaar en wees vol liefdevolle omgee en nederigheid. 1 Pet. 3:5 tot 8 – PWL.

Sowat 1200 jaar na die uittog uit Egipte het YHVH deur die profeet Maleagi die volk se geestelike welstand evalueer en ondermeer gesê dat hulle afgewyk het van YHVH se vereiste maatstaf van die huwelik

“Hierdie is nog iets wat julle doen; julle bedek die altaar van יהוה met trane, met gehuil en gekreun omdat Hy nie langer die offer ag nie en dit nie van julle hand aanvaar met guns nie. Tog vra julle: ‘Om watter rede?’ Omdat יהוה Getuie is tussen jou en die vrou van jou jeug teenoor wie jy verraderlik opgetree het, alhoewel sy jou metgesel is en jou vrou deur die verbond. Nie een mens wat iets van die Gees oor het, maak so nie en wat het hy gedoen terwyl hy 'n Goddelike nageslag gesoek het? Neem julle gees in ag en laat nie een verraderlik optree teenoor die vrou van sy jeug nie, want Ek haat egskeiding,” sê יהוה, die God van Yisra'el “en hom wat dit wat verkeerd is met sy kleed bedek,” sê יהוה-Tzva'ot. “Neem julle dan jul gees in ag dat julle nie verraderlik optree nie.” Maleagi 2:13 tot 16 – PWL.

Daarom het YHVH sy seëninge van die volk weerhou omrede hulle nie die verbond met die liefde van hulle jeug eerbiedig (onderhou) het nie. Die volk het afgewyk van YHVH se standaard (vereiste) vir die huwelik en hulle eie standaard daar gestel. YHVH se standaard is dat hy die huwelik as 'n verbond tussen man en vrou beskou en daarom haat YHVH egskeiding, want dit is die verbreking van 'n verbond.

Die Huweliksverbond

Die sukses van 'n gelukkige huwelik is gesetel in die feit dat die huwelik 'n verbond is en as sulks eerbiedig moet word. Dit vereis begrip van die doel en betekenis van 'n verbond en dat die beloftes en voorwaardes van die verbond deur beide die man en die vrou nougeset nagekom moet word.

YHVH het die huwelik ingestel en daarom sal Hy die vereistes stel en die antwoorde vir 'n gelukkige en geseënde huwelik voorsien.

Indien die skepping van die mens soos opgeteken in Genesis 1 en 2 in oënskou geneem word, is dit duidelik:

- YHVH het gesê dat dit nie goed is dat die mens alleen is nie. Daarom het YHVH besluit dat Adam 'n lewensmaat moet hê (Gen. 2:18 en 20) – iemand wat vir hom 'n hulp (intelektueel, emosioneel en fisies) kan wees. Daar was dus 'n behoefte, of leemte, by Adam wat YHVH moes aanvul.

- YHVH het 'n lewensmaat gebou uit die rib van Adam (Gen. 2:21 en 22). Die Hebrees vir bou (*banah*) beteken om met vaardigheid, kunstigheid en sorg iets te maak of te herstel. Die vrou is met sorg gemaak om die man aan te vul en by te staan ten opsigte van sy geestelike, emosionele en fisiese behoeftes. In die verband skryf Paulus die volgende:

'n Man is nie verplig om sy kop toe te maak nie omdat hy die beeld, eer en lof van God is, maar die vrou is die eer en lof van die man, want die man is nie vanuit die vrou nie, maar die vrou vanuit die man en die man is ook nie ter wille van die vrou geskape nie, maar die vrou ter wille van die man. Die vrou moet daarom 'n aanwysing van outoriteit oor haar kop hê ter wille van die engele. Tog is die man nie afsonderlik van die vrou nie en die vrou ook nie afsonderlik van die man in ons Meester nie, want net soos die vrou vanuit die man is, so is ook die man deur die vrou, maar alles is vanaf God. 1 Kor. 11:7 tot 12 – PWL.

YHVH het Eva aan Adam voorgestel (Gen. 2:22) en was ook persoonlik betrokke by die eenwording tussen man en vrou (Gen. 2:24). YHVH het ook die voorwaardes van die eenwording bepaal, naamlik hulle sal een vlees word (Gen. 2:24). Hierdie eenwording is die beginsel wat in 'n verbondsverhouding geld. Die twee word as te ware een persoon (identiteit)(Gen. 2:23). Daarom deel en ervaar hulle alles saam – as een vlees!

Hierdie verbondsverhouding in die huwelik moet op die horisontale en vertikale vlak wees. Horisontaal tussen die man en sy hulp (vrou, eggenote), en vertikaal as individu, maar ook as eenheid met YHVH. Hierdie eenheid, naamlik hierdie verbond, mag nie verbreek word nie!!

Yeshua Messias se lering aangaande die huwelik soos opgeteken is in Matt. 19:3 tot 9, was presies bogenoemde en het Hy dit ook so aan die Fariseërs verduidelik.

Fariseërs het na Hom toe gekom om Hom te toets en vir Hom gesê: “Is dit volgens die wet vir 'n man om oor enige rede van sy vrou te skei?” Hy antwoord egter en sê vir hulle: “Het julle nie gelees dat Hy wat hulle aanvanklik gemaak het, hulle man en vrou gemaak en gesê het: ‘Om hierdie rede sal die man sy vader en moeder verlaat en aan sy vrou vaskleef en hulle twee sal een vlees wees’ sodat hulle nie meer twee is nie, maar een vlees, nie? Wat God dan een gemaak het, laat geen mens dit skei nie.” Hulle sê vir Hom: “Waarom het Moshe dan beveel om 'n skeibrief te gee en haar weg te stuur?” Hy sê vir hulle: “Omdat Moshe julle weens die ongevoeligheid van julle verstand, wil en emosie toegelaat het om van julle vroue te skei, maar aanvanklik was dit nie so nie. Ek sê vir julle dat wie ook al van sy vrou skei, anders as oor seksuele immoraliteit en 'n ander een trou, egskeiding pleeg en wie ook al met die geskeide vrou trou, pleeg egskeiding.” Matt. 19:3 tot 9 = PWL.

Opsommend het Yeshua die volgende gesê:

- Die siening en standaard van die huwelik soos die Fariseërs voorgehou word, is benede YHVH se standaard en vereiste. Egskeiding is egter later toegelaat onder die wet (deur Moses) weens die hardheid van die volk se harte. Van die begin af was dit egter nie so nie.
- YHVH se doel met die huwelik is soos YHVH dit beplan het toe Hy Adam en Eva geskape het, naamlik dat 'n man en vrou een sal word en nooit moet skei nie.

Hierdie eenwording in die huwelik moet so volkome wees dat beide as te ware hulle eie identiteit en geaardheid verloor en een nuwe identiteit en geaardheid vorm deurdat hulle een vlees word. Dit is 'n eenwording van gees, siel en liggaam om iets nuuts te vorm!!

Die feit dat egskeiding om ander redes as egbreuk plaasvind, is deel van die mens se sonde geaardheid. Die doel van Yeshua se versoeningswerk aan die kruis is ondermeer om die huwelik te herstel tot die standaard soos deur YHVH gestel is.

Prediker 4:9 tot 12 is bevestiging van YHVH se doel vir die huwelik en die voordele wat dit inhou:

Twee is beter as een, want hulle het 'n goeie beloning vir hulle moeitevolle arbeid. Want as hulle val, kan die een sy maat optel, maar wee die een wat val sonder dat daar 'n tweede is om hom op te tel. Verder, as twee bymekaar lê, kry hulle warm; maar hoe kan een allennig warm word? En as iemand die een aanval, kan altwee hom teëstand bied; en 'n driedubbele lyn word nie gou verbreek nie.

Hierdie teksverse kan soos volg verduidelik word:

- Vers 9: Twee wat tesame arbei, bereik meer in die lewe.
- Vers 10: Daar is wedersydse geestelike, morele en fisiese ondersteuning.
- Vers 11: Die warmte en sekuriteit van die huwelik (verwysend ook na die seksuele en intieme verhouding).
- Vers 12: Wedersydse beskerming en ondersteuning teen die aanslae van die lewe. YHVH self gee sterkte aan die tou, naamlik aan die eenwording van man en vrou. *'n Driedubbele lyn word nie gou verbreek nie* verwys na die drie-eenheid wat in 'n huwelik moet wees, naamlik man en vrou en YHVH. Vader-God is die derde deel van die tou wat die sterkte aan die huwelik gee.

Die mees suksesvolste en gelukkigste huwelike is waar beide man en vrou YHVH met totale oorgawe volgens Torah dien. Die man moet ook die geestelike leier (die beskermer en voorsiener) van sy huis wees wat bevoeg is om die vrou te onderrig aangaande die dinge van YHVH (1 Tim 2:11 en 12). Die vrou moet wel haar kinders onderrig ten opsigte van geloof, liefde en heiligmaking (1 Tim. 2:15).

Mans het 'n hulp nodig!

Van al die wesens wat YHVH geskape het, en wat Adam 'n naam voor moes gee, was daar nie een wat by Adam gepas het nie (Gen. 2:20). YHVH het gesê dat dit nie goed is dat die mens (die man) alleen moet wees nie (Gen. 2:18), daarom het YHVH vir die man 'n hulp gemaak wat by hom pas. Die vrou is die man se hulp wat hom in staat stel om te wees en te bereik dit wat YHVH hom voor bestem het.

Die woord “hulp” beteken ook *om te omring, te beskerm, om uit te help en te ondersteun*. Hierdie hulp verwys eerstens na die geestelike-, intellektuele en emosionele hulp, en dan die bevrediging van die man se sintuie.

Die man moet sy vrou versorg en behandel as 'n hulp wat vir hom noodsaaklik is en sonder wie hy nie kan klaar kom nie. Hy moet haar liefhê soos Yeshua die gemeente (Sy bruid) liefhet en soos hy homself liefhet (Ef. 5:25 en 28). Dan alleenlik sal die man die werklike waarde van sy vrou besef en YHVH se seën ontvang en dit kan wees wat YHVH wil hê hy moet wees.

Daarom is dit belangrik dat 'n man met sekerheid van sy huweliksmaat moet kan sê: “*Dit is nou eindelik been van my gebeente en vlees van my vlees*”, want sy keuse is 'n lewenslange verbintenis.

Indien Adam alleen sou wees, en niemand anders gehad het om lief te hê soos homself nie, sou sy hele bestaan egosentries (die eie ek is die middelpunt) gewees het. Ware liefde haal die fokus van jouself af en plaas die fokus op die een wat jy liefhet. Dit is die YHVH-tipe liefde (*agape*); dit is verbondsliefde. Verwys 1 Korinthiërs 13, veral verse 4 tot 7.

Beide man en vrou staan op gelyke voet voor YHVH. Die enigste onderskeid wat YHVH maak is in die gesagsorde waar YHVH die hoër gesag aan die man toeken (Ef. 5:23).

Omrede die man die hoof van die vrou is, is die vrou daarop geregtig om gekoester en versorg te word, want haar geluk en toekoms is nou grootliks van haar man afhanklik.

In 'n huweliksverbond, soos in enige verbond, is jou eie belange en behoeftes ondergeskik aan jou verbondsvennoot se belange en behoeftes. Die verbondsbelofte is egter dat indien beide getrou is aan YHVH en aan mekaar, dan sal YHVH aan beide die begeertes van hulle hart gee.

Bepeins of Bespreek

1. **Vraag:** Wat is die kernorsaak van 'n ongelukkige huwelik? **Antwoord:** Selfsugtigheid! Die begin van die verbodskeling van 'n huwelik is wanneer eie belange bokant die van huweliksmaat en kinders gestel word.
2. Liefde het niks te doen met wat jy verwag om terug te ontvang nie. Liefde het slegs te doen met wat jy bereid is om te gee en ware liefde is bereid om alles te gee. Wat jy terug ontvang sal wissel, maar dit het geen verbintenis met wat jy bereid is om te gee of hoeveel jy gee nie. Jy gee alles en verwag niks omrede jy waarlik liefhet!! Is dit hoe jy jou huweliksmaat liefhet?
3. *True marital love is not a once-done, permanent thing. It is a growing, living and unfolding journey throughout one's natural life* – Jerold Aust.
4. Die vrou is nie gemaak uit die voete van Adam nie en daarom is sy nie benede hom nie. Sy is nie gemaak uit die kop van Adam nie en daarom is sy nie bokant hom nie. 'n Vrou is gemaak uit die sy (ribbebeen) van Adam en daarom staan sy langs hom as sy gelyke.
5. Wat is 'n huwelik sonder humor?!



Hulpbronne vir studie oor die huwelik:

1. Die boek van Dr Skip Moen, *Guardian Angel: What You Must Know about God's Design for Women*, word sterk aanbeveel (veral vir mans!) en is verkrygbaar as hardekopie of as 'n e-boek by: <http://skipmoen.com/products/guardian-angel/>
2. 'n Studie (kursus) oor die huweliksverbond is op aanvraag gratis beskikbaar deur ons te kontak by kontak@nuwelielied.info

-0-0-0-0-0-0-0-0-

Shabbat Shalom in Yeshua.

Johan

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.